

光緒江西通志

江西通志卷一百三十八

列傳五

南昌府五

明

劉一燝字季晦南昌人萬曆十六年一燝與兄一焜一煜並舉於鄉越七年又與一煜並舉進士改庶吉士授檢討一焜爲考功郎掌京察大學士沈一貫欲庇其私人錢夢皋鍾兆斗屬一燝爲請謝不可夢皋等竟以中旨留由是忤一貫意尋歷祭酒詹事掌翰林院事四十五年春京察黨人用事謀逐孫承宗繆昌期等一燝力保持得免故事掌院無滿歲不遷者一燝居四年始遷禮部右侍郎光宗卽位擢禮部尙書兼東閣大學士偕韓爌並命時內閣止方從哲一人一燝爌甫拜命帝已

得疾偕諸臣召見乾清宮帝崩諸臣入臨畢一燎詰羣
奄皇長子當樞前卽位今不在何也羣奄東西走不對
東宮伴讀王安前曰爲李選侍所匿耳一燎大聲言誰
敢匿新天子者安曰徐之公等慎勿退遂趨入白選侍
選侍領之復中悔挽皇長子裾安直前擁抱疾趨出一
燎見之急趨前呼萬歲捧皇長子左手英國公張惟賢
捧右手掖升輦及門宮中厲聲呼哥兒卻還使使追躡
者三輩一燎傍輦疾行翼升文華殿卽東宮位羣臣叩
頭呼萬歲事稍定選侍猶趨還乾清時選侍居乾清一
燎曰不可宜暫居慈慶皇長子心憚選侍然之一燎語
安曰主上冲年無母后外庭有事吾受過宮中起居公
等不得辭責明日嘉謨及左光斗疏請移宮首輔從哲

徘徊其閒已又欲緩移宮一燬曰本朝故事仁聖嫡母也移慈慶慈聖生母也移慈甯今何日可姑緩邪初五日偕同官請卽日降旨立宮門以俟選侍不得已移熾鸞宮天子復還乾清事始大定帝旣踐阼從哲被劾在告一燬遂當國與嬪相得甚歡念內廷惟王安力衛新天子乃引與共事安亦傾心嚮之所奏請無不從中外望治明年天啟改元瀋陽失廷臣多請復用熊廷弼一燬亦言廷弼守邊一載殘疆晏然不知何故翦除陛下當毅然主持尋有詔盡謫前排廷弼者姚宗文等官言路多怨一燬初選侍將移宮其內豎李進忠劉朝田詔等盜內府祕藏過乾清門仆金寶墮地帝憾選侍甚必欲誅盜奄王安爲司禮亦惡之諸奄百方救卒不得入

而帝漸忘前事安亦爲魏忠賢排死諸奄乃厚賄忠賢爲地而上疏辨冤帝果免朝死下其疏法司一燬執奏詔等議誅久無可雪疏直下部前無此制帝不得已下其疏於閣一燬復言此疏外不由通政司內不由會極門例不當擬旨謹封還原疏由是忠賢輩大恨定陵工成忠賢欲以爲功一燬援故事內臣非司禮掌印及提督陵工不得濫廕止擬加恩三等諸言官論客氏被謫者一燬皆疏救又請出客氏於外及言官交章論沈淮淮疑一燬主之與忠賢客氏比而齟一燬又密窺魏客等漸用事一燬勢孤是年四月候補御史劉重慶遂力誡一燬不可用給事中侯震暘御史陳九疇復劾之并刺其結納王安於是一燬四疏乞歸堅臥不起疏凡十

二上乃令乘傳歸已而忠賢大熾矯旨責一燬誤用廷
弼削官追奪誥命勒令養馬崇禎改元詔復官一燬在
位累加少傅太子太傅吏部尚書中極殿大學士八年
卒贈少師福王時追諡文端

明史

徐良彥字季良新建人萬厯進士初令婺源力折大璫
礦稅新安一郡賴之起復補溧水令值大璫查馬場復
力阻之擢河南道御史抗疏福王當之國異己者指爲
門戶外轉福建參議至則禽海盜王四等八十餘人尋
分守青州會白蓮盜起齊魯之間無甯宇以計弭之渠
魁如張道人唐道人一呼皆至故齊魯騷動而青州雞
犬無驚尋晉尙寶大理丞左通政歷仕途凡二十八年
始命巡撫宣府在事僅一月白言台吉毛乞歲等犯邊

皆鞭箠使之會魏忠賢蓄志叵測以宜雲密邇京師使其客說通往來如是三四終不應而崔呈秀疏劾至矣疏中謂宜府巡撫何以取之如寄云爲趙南星之黨也時得旨降調崔魏意不愜復以汪文言獄羅織餽文言贖論戍附近而大司馬迎忠賢意與戍清浪蓋清浪與楚附近其實隸貴州也得旨之日買舟入黔著書賦詩若不知爲負罪行者忠賢時布置伺察往來黔楚道間亦不爲懼崇禎初錄用貶竄諸臣起大理寺卿升南京工部侍郎

人物

舒曰敬字元直南昌人萬厯進士授泰興知縣六閏月城修政舉以校斃巨窩張耀忤太守吳秀意中之於礙使士民冤之赴闕訟令無罪時值柄政者修黷僅下部

議而曰敬解綬行矣裝不具賣所束帶百姓貯帶於庫
爭餽薪米構祠祀像名遺帶亭曰敬歸未幾左遷徽州
府儒學教授致仕紫陽山白鹿洞諸社皆臨以講席一
時名公鉅卿多出其門前後撫按暨南北臺省奏薦凡
三十一次崇禎閒尙書沈演復專疏薦用奉旨條陳時
務因上七策十論進覽采納敕部議用未赴山居幾五
十年貧約如諸生門人分俸卽均於弟姪併族人鄉人
之鰥寡者所著有隻立軒前集續集四書易經講意詩
經臆解時務要略諸書年七十有九門人萬時華等私

謚文侃先生

人物志

胡良機字省之南昌人萬厯進士厯知臨淄益都二縣
天啟初擢御史疏論乳媪中涓又請停內操楊漣擊魏

忠賢良機亦上疏言忠賢之惡不減汪直劉瑾陛下過
優容而閣臣不據法爭豈真所謂門生宰相邪忠賢及
魏廣微深憾以年例遷廣東參議良機方按貴州不候
代而去遂斥爲民崇禎元年起故官按宣大二鎮年滿
當代衰以敏練令復巡一年尋爲中官王坤劾罷久之
起光祿典簿終南京吏部主事

白志

涂喬遷字伯友南昌人萬厯進士令合肥擢山東道御
史適有三王並封之旨朱維京王如堅痛哭爭之疏上
兩人俱遣戍喬遷抗章力爭已長安雷火地震喬遷申
言災不虛生皆因國本未建語甚切直尋降典史光廟
改元特起勳丞升太僕少卿改南太僕卿適范濟世爲
操江都御史思有以媚璫詭言南鹽馬諸庫藏積銀百

餘萬非內臣搜括不可得魏璫喜遣其養子胡良輔等至索所稱百餘萬運使運同暨揚州前後守下至胥役俱以迫賄收逮復坐索二十六萬於太僕喬遷曰虛派以殺人吾不忍良輔恚曰如若言何以復厥公是時方有建祠之事良輔曰曷建厥公祠以畢斯舉喬遷曰吾頭可斷祠不可建也良輔以其語聞逆璫未幾指爲門戶削奪喬遷始終抗直然居鄉和易近人無大小偃僂接之崇禎中復原官議起用卒

府志

周著字誠子南昌人萬厯進士由推官厯太守藩臬皆以廉明稱庚申任四川右布政使天啟辛酉科臣明時舉捧檄起土司兵應調援遼永甯酋長奢崇明令土目將兵一萬詣重慶聽撫臣徐可求點視可求杖其土目

又欲盡黥士兵之面以別記驗於是士兵洶洶思亂統領人樊龍樊虎振臂一呼皆響應立殺可求遂陷重慶進逼成都左布政使朱爕元攝軍務事分遣諸將領兵據隘而與諸藩臬畫地城守著自署西城賊稔知西城勢易拔終日夕攻不去置雲樓高與城等著出兵亟擾賊營別遣卒持火具焚其雲樓賊益夜縱炬千餘火門著復取水如瀑布下澆之賊引退終不能下明年正月忽城外大譟而至視之有物如舟高城丈許長五百尺樓數重上板屋如平地中載賊數千人各挾機弩毒矢以牛數百頭運石轂行之俯視城中著曰此呂公車也乃用巨木爲杆柱置軸柱閒挽索運杆取巨石重千鈞者發之飛擊如彈丸又夜絕敢死士於城下載大銃擊

賊賊遁去成都復全自十月甲申至壬戌正月乙丑抗
守者百二十日事定變元進副都御史巡撫四川著代
變元爲左布政使後入覲歸以勞瘁卒於家崇禎初贈

大理寺卿

府志

熊宇奇字正子新建人萬厯進士筮仕刑曹京師有冤
獄淹繫三年宇奇一訊而決以僉憲督學湖廣參蜀藩
討播軍興宇奇督理糧餉烈日乘馬會水溢馬斃徒步
草鞮艱苦萬狀捷奏晉一秩尋改浙江副使厯湖廣按
察使晉右布政天啟二年中璫浸用事遂挂冠歸未幾
魏忠賢逆祠徧興江西撫臣楊邦憲使斂費作祠宇奇
正色厲言江右水旱頻仍豈宜困以土木且璫功德於
江右何有中丞意不可回議徹周程祠爲祠趾宇奇與

諸紳議安有毀先賢祠爲瑄祠者詣當事力爭會璫敗

逆祠中格宇奇之力也

人物志

傅宗皋字直甫豐城人萬厯進士知將樂縣行取爲南京監察御史時鹽政壞操院以宗皋聲望隆題請督理鹽政及督京倉請改折一十七萬去官攢守候之苦庚申八月營軍譚宗皋帶管京營以法戢之升南尚寶卿尋以忤瑞奪職歸里於地方利弊知無不言楊比部疏減遼餉宗皋力佐之邑父老至今能道其事後起大鴻臚固辭

縣志

臚固辭

萬燦字聞夫南昌人兵部侍郎恭孫也少好學砥礪名行萬厯進士授刑部主事嘗疏論刑獄干和天啟初元兵事棘工部需才調燦工部營繕主事督治九門垣墉

市銅江南皆勤於其職遷虞衡員外郎司鼓鑄時慶陵大工未竣費不貲燦知內府廢銅山積可發以助鑄移牒內官監言之魏忠賢怒不發燦遂具疏以請忠賢益怒假中旨詰責燦旋進屯田郎中督陵務其時忠賢益肆廷臣楊漣等交擊率被嚴旨燦憤抗章極論略言忠賢性狡而貪膽麤而大口銜天憲手握王爵廕子弟則一世再世資廩養則千金萬金毒痛士庶斃百餘人威加搢紳空十數署一切生殺予奪之權盡爲忠賢所竊內廷外朝止知有忠賢不知有陛下尙可一日留左右邪疏入忠賢大怒矯旨廷杖一百斥爲民執政言官論救皆不聽當是時忠賢怒廷臣交章劾已無所發忿思借燦立威乃命羣奄至燦邸捽而毆之比至闕下氣息

纔屬杖已絕而復甦羣奄更肆蹴踏越四日卽卒忠賢憾猶不置誣以贓賄三百燬廉吏破產乃竣崇禎初贈

光祿寺卿福王時賜諡忠貞

明史

晏文輝號懷泉南昌人萬厯進士授浙江太平知縣調繁武進正士習清賦役決冤獄建先賢祠修縣志行取刑部主事考選南禮科給事中疏參代藩織造及方面貪劣官三十人又請兩監庶額宗室開科獨署九印六

管京營旋告歸

縣志

李繼周字汝輔南昌人萬厯進士授上海令升刑部主事識訊明允尋奉命審決河北以內艱歸服闋補員外厯郎中出守黃州擢川東副使至達州會奢崇明奉援邊之檄率部下抵重慶中丞徐可求移書繼周促其前

計封疆事甫抵重慶崇明部下煽亂遂遇害一時文武臣僚身殉者十餘人獨繼周以局外蒙難事聞贈光祿卿達州舊有四忠臣皆功德被於此土者州守黃立言請以繼周增入而道臣孫好古與繼周同遇害遂並列爲六忠祠云

人物志

熊明遇字良孺進賢人萬厯進士知長興縣擢兵科給事中疏極陳時弊言今春以來天鼓雨震於晉地流星晝隕於清豐地震二十八天火九石首雨菽河內女妖遼東兵端吐火卽春秋二百四十年閒未有稠於今日者且山東大祲人相食黃河水稽天兼以太白經天輔星湛沒熒惑襲月金星愆行或日光無芒或日月同暈爲恆風爲枯旱天譴愈深而陛下所行皆誣天拂經之

事此誠禽息碎首賈生痛哭之時也敢以八憂五漸三
無之說進帝不省卅詩教等以明遇與東林通出爲福
建僉事遷甯夏參議天啟初進太僕少卿尋擢南京右
僉都御史提督操江魏忠賢黨謀盡逐東林以明遇嘗
救御史游士任給事中薛國觀遂劾其黨庇徇私忠賢
矯旨革職未幾坐汪文言獄追贓千二百金謫戍貴州
平谿衛崇禎初釋還起兵部右侍郎南京刑部尙書召
拜兵部疏陳四司宿弊悉見采納山東叛將李九成等
陷登州明遇信巡撫余大成言力主撫議久不就撫乃
調關外軍討定之是時宣府兵警甚急巡撫沈榮與中
官王坤等遣使議和餽金帛酒牢諸物邊警卽解事聞
帝惡榮專擅召對明遇等於平臺明遇力爲榮解帝不

說逮朶下吏於是給事中力詆明遇朶交關誤國明遇再疏乞罷命解任候勘尋以故官致仕用薦起南京兵部尚書改工部引疾歸卒所著有綠雲樓集中樞集子

人麟崇禎進士

明史
白志

劉綎都督顯子勇敢有父風用脰爲指揮使萬厯初從顯討九絲蠻遷雲南迤東守備緬甸犯永昌騰越巡撫劉世曾請濟師擢綎遊擊將軍署騰衝守備事緬甸自其酋莽瑞體以兵服諸番勢遂強江西人岳鳳者驍桀多智結耿馬南甸諸賊率象兵數十萬分道內侵綎至軍大振鳳懼令妻子及部曲來降綎責令獻金牌印符及蠻莫猛密地乃以送鳳妻子還隴川爲名分兵趨沙木籠山據其險而已馳入隴川境鳳度四面皆兵遂詣

軍門降綖復率兵進緬緬將先遁留少兵隴川綖攻之
鳳子翼烏亦降綖乃攜鳳父子往攻蠻莫乘勝掩擊雲
南平獻俘於朝綖進副總兵子世蔭綖將家子父顯部
曲多健兒綖擁以自雄征緬之役勒兵金沙江築將臺
於王驥故趾威名甚盛然性貪御下無法詔革任以遊
擊候調無何羅雄變起綖解官至霑益世曾喜令與裨
將劉紹桂萬整分道進討綖直擣其巢拔之連克三砦
賊盡平首功止五十餘級而撫降者萬餘人論者稱其
不妄殺召授五軍三營參將會朝鮮用師詔以副總兵
從征及班師進都督同知世蔭千戶移師征播酋楊應
龍擢四川總兵官應龍熟綖才頗懼益兵守要害梅木
等三峒絕險綖分兵攻其三面生禽其魁乘勢克三關

盡克三峒踰十餘日克後水固營於冠子山會諸軍共
平賊錄功進左都督世廕指揮使綖爲將數被黜抑性
驕恣如故以軍政拾遺罷歸四十六年召爲左府僉書
明年二月經略楊鎬令綖及杜松李如柏馬林四路出
師綖兵四萬由寬奠道險遠重岡疊嶺馬不能成列次
深河連克牛毛馬家二砦已深入三百里杜松軍覆猶
不知復整眾進登阿布達里岡力戰不支遂死養子劉
招孫最驍勇突圍中格殺數人亦死事聞遣中使祭陣
亡將士恤綖家綖於諸將中最驍勇歷平緬寇平羅雄
平朝鮮倭平播酋平獐大小數百戰威名震海內所用
刀百二十斤天下稱劉大刀天啟初贈少保世廕指揮
僉事立祠曰表忠

國朝賜諡忠壯

明史 勝朝
殉節諸臣錄

胡海定字聖占南昌人萬厯舉人署樂平教諭善造士如王綱許琮皆以經術節義名一時巡按邢紹德特薦崇禎年閒詔舉賢良方正副使張有譽以名聞遷汜水令賊壘壓境鼓諸生王壁等決死戰斬馘頗多廉得煽亂者數十人計禽斬之亂遂定歲饑設賑存活萬人以不奉催科檄投効去甲申聞京師陷慟哭不食累日歸葬其父移其母去所居海口四十里走樂平聯絡鄉勇復乞師黃道周道周壯之執手謂曰君以致仕令家居能仗節倡義如此引滿酌之立爲發師引戰不勝被執死於婺源旣受刃僵立不仆婺源人隕涕曰江西真有

人

國朝賜諡節愍

邱邦士集勝朝殉節諸臣錄

姜曰廣字居之新建人萬厯進士授庶吉士進編修天啟六年奉使朝鮮不取一錢朝鮮人爲立懷潔之碑魏忠賢黨以曰廣東林削其籍崇禎初起右中允積官至吏部右侍郎坐事左遷引疾去十五年起詹事掌南京翰林院福王立改禮部尙書兼東閣大學士史可法督師揚州曰廣與高宏圖協心輔政而馬士英挾擁戴功謀擅朝權深忌曰廣未幾士英薦阮大鍼曰廣力爭不得遂乞休與士英交詆王前劉澤清假諸鎮公疏攻劉宗周及曰廣以三案舊事及迎立異議爲言曰廣屢疏乞歸其後金聲桓反江西迎曰廣以資號召聲桓敗曰廣投餓家池死

國朝賜諡忠確

明史 勝朝 殉節諸臣錄

李曰輔字元卿南昌人萬厯舉人天啟初爲成都推官巡撫朱變元倚以兵事偕諸將攻復重慶崇禎四年擢南京御史時遣中官出鎮曰輔疏諫曰邇者一日遣內臣四尋又遣用者五非兵機則要地也假專擅之權駭中外之聽啟水火之隙開依附之門灰任事之心藉委卸之口小臣不敏實爲寒心陛下踐阼盡撤內臣中外稱聖昔何以撤今何以遣天下多故擇將爲先陛下不築黃金臺勤招頗牧乃急急內臣是遣曾何補理亂之數哉疏上鐫三級爲廣東布政司照磨歸隱西山香城寺潛心理學攜一僕與居尋遣還與僧共晨夕而已山居十餘年卒

白志

鄒元忠字時効新建舉人萬厯中知增城縣勤政愛人
力持古道築號舍數十於學宮之東與諸生講學請廣
科試額遂爲例丙申大饑發倉捐俸賑濟全活以萬計
又於城東四十里築隄三千一百尺以除水患民賴有
秋擢延平同知不就歸增之人士俎豆不衰

廣東通志

夏以賓字于王新建人萬厯鄉舉授延平推官八閩大
獄輒令按鞫多所平反轉甯波同知計禽通番巨猾獲
贓千餘緡以助餉未幾海寇竊發承檄勒兵渡海進屯
龍王嶺設伏制勝以孤軍挫賊數萬兩臺舉卓異遭讒
左遷拂衣歸著有奚囊蠹餘理閩讞錄藏於家

縣志

宋應昇字元孔奉新人尙書景曾孫萬厯乙卯鄉試與
弟應星並魁其經時有二宋之目五上公車不第謁選

得湘鄉知縣復補恩平歷高州同知升廣州知府所至
有慈惠聲家居孝友恭謹親族困乏必勉振之自廣州
請告歸未幾卒所著有方玉堂集

人物志

劉洪謨字惟後南昌人進賢籍萬歷進士授建德知縣
調仁和皆有惠政升南工部主事禮部郎中尋知承天
府抗陵監不肯下調真定升易州兵備歷漳南參政晉
光祿少卿太僕少卿魏璫燄灼三疏告休得旨歸里居
講學隨時間答多所啟發撰大學續衍義十八卷洪謨
嘗與顧憲成趙南星論學不爲標榜著書五十種晚有
夕惕內照篇以自敘

人物志

劉仕瞻字淡峯南昌人萬歷進士知宣城縣兼有神君
慈母之稱擢兵科給事中嘗爭國本忤旨其後以軍政

考選有霍文炳者以緝捕功自副千戶升指揮僉事內
坐以市恩降褫職屢薦不起卒天啟二年贈光祿寺少
卿初仕瞻治宣城與黎道炤涂喬遷齊名泊登言路入
錮籍又同時人謂之歲寒三友

人物志

吳羽文字長卿南昌人萬歷進士擢吏部因事乞歸崇
禎六年始復出歷考功文選郎中時帝疑吏部有私選
郎十一人譴黜大半遷者僅三人羽文因痛絕諸弊數
與溫體仁抵牾賊毀皇陵有詔肆赦體仁令刑部尙書
馮英以逆案入詔內羽文執止之而議起錢龍錫李邦
華等偵事者誣羽文納二人賂下獄羽文用高鳳翔爲
大名知府鳳翔嘗坐小事言者復謂其徇私坐謫戍侍
郎吳甦等交薦復官未赴卒

明史鄒
維連傳

羅汝元字懋先南昌人萬厯進士授行人擢御史出按雲南值安邦彥狂逞與奢崇明相應汝元同都御史閔洪學戡定之黔國沐昌祚怙寵而驕侵士庶膏腴廣其莊田又抗不納賦乃以黃白物詭白米四十石黃米二十石來饋汝元峻詞卻去疏請田歸黔國徵收歸有司又偵知其左右肆虐者八人置之法民皆手額歡呼號曰羅鐵面爲建卻金救民亭演士苦公申費括所積俸給之於是三十七人咸踴躍就道演士本年計偕自汝元始升太僕少卿適魏忠賢專政削奪歸里崇禎初起廢籍厯通政擢僉都御史巡撫浙江浙之當國者中以蜚語落職歸汝元官至九列猶獲事父母舞綵承歡一

時以爲盛事

府志

鄒復宣字用晦新建人萬厯進士授上虞令調金華值歲旱露禱甘霖立注擢御史會邊事急合諸徵募廷臣具復宣名以上奉命予餉三十萬聽便宜從事復宣核蠲懲濫加意撙節用不滿六萬金簡戰士數千皆投石超距一可當百大司馬倚賴之壬戌復宣再視城務卒贈光祿寺少卿祀鄉賢孫度珙順治戊戌進士翰林院檢討度鏞康熙癸卯鄉試第一丁未進士

人物志

魏時應南昌人萬厯進士初任建陽知縣擢工部主事調吏部歷考功文選員外郎特疏請簡用鄒元標趙南星以副當世之望銓故弊數疏立四季考察法有受賕犯律者得參送法司如五部例旨下著爲令轉驗封郎中給假奉母還里林居十餘年會東林議起以時應前

疏薦元標南星故出爲閩藩左參厯按察使天啟中晉光祿寺卿羣小方共斥鄒趙改時應南通政旋冠帶閒住崇禎初卒於家著春秋質疑諸書行世

府志

劉曰梧字陽生南昌人萬厯進士授中書擢御史巡視中城會詔令僉商以供薪炭曰梧不終朝竣事請託者不能及出按三吳稅事方起自金陵至皖城計程不旬日瑄立七廠以朘民曰梧令并爲一民困少紓已而刷卷南畿歸會九載考績卽家起南太常少卿祀高皇寢園徘徊東陵感愴遜國時事重傷孝康皇帝之已謚而復去也因上瞻顧陵寢一疏得賜廟諡識者偉之以右僉都御史巡撫薊州疏請除夙弊寬文網拔孫顯祖於行間天啟閒方引疾歸尋起少司馬抵京市月以與大

學士一燦同族爲魏忠賢所忌遂拂衣歸年八十二卒

崇祀鄉賢

府志

余樞字謹叔新建人萬厯鄉舉令江浦邑有張史二圩
齧於江水額賦五百餘石累通縣百餘年樞至急行周
視躬率民修築不避暑雨隄成而害絕巡邏使者按臨
諸賈持茶例銀以進約萬餘金樞峻卻之遷興國知州
有傳僞漢遺孽柯陳兩姓謀不軌於境上者方伯熊宇
奇檄樞往案曉以人言籍籍當慎舉動以保田廬家室
兩姓感泣遂消亂萌崇禎間卒祀鄉賢

人物志

朱試字以功南昌人在童子中卽端嚴不苟顰笑受學
於章布衣潢畫討夕論多獨得之悟撰時習錄就正篇
諸書晚益深於易有所論著未竟天啟中御史田珍薦

試於朝未及授官而卒

府志

朱謀瑋字明父一字鬱儀甯獻王七世孫封鎮國中尉萬曆辛卯給諫葉初春以學行薦於朝巡撫邊維垣巡按陳倣交相推轂得旨俾理石城王府事公族有所紛競無不請質瑋片言剖決皆屈服而去生而天資穎異目所流覽終身不忘貫串羣籍通曉朝廷典故諸王子孫好學敦行自周藩中尉睦樛外莫有及者謀瑋以先儒譚易尙理而置象不能獲文周孔子立言之旨作易象通八卷以朱文公詩注於比興微詞妙旨多鬱而未章乃原本小序酌諸家得失作詩故十卷疾緯候之亂三五典墳也作遂古記八卷以糾正圖識之尤謬疾李斯之變壞頡誦舊文也作古文奇字輯解追述先聖之

制作以鍼砭漢世訓詁之沈疴他若書禮春秋魯論大戴各有箋疏又著金海百二十卷與林十有六卷駢雅二卷六書本原一卷說文舉要水經注箋四十卷豫章耆舊傳二卷藩獻記一卷晚成古今通歷用其法推左傳僖五年正月辛亥冬至昭二十年二月己丑朔冬至以爲魯史所用皆周正故經書春王正月明非夏商之正也於時諸侯僭竊天下衰微鮮行頒朔之禮晉楚大國或用夏正未能齊一魯秉周禮獨不敢變故孟獻子稱正月日至可祀上帝是已其論醫則有取於張子和論壬遁則有取於祝泌論陽九百六則有取於王希明悉鑿鑿見於徵驗而於堪輿之說尤精嘗言祖墓病水以語諸父兄弟咸弗信會羣從暴卒者十餘輩埵不能

忍遂自發之墓中果積水若谿澗諸父始遜謝自咎別
移吉壤著書百十有二種皆手自繕寫病革猶與諸子
說易焦竑嘗曰鬱儀制作精微宏博一依六經莫可簡
選湖廣李維禎山東刑僑福建曹學佺屈指江右人物
輒首及之子統銓崇禎丁丑進士詩澹遠高古槩燬於
兵不傳

明史南王詩
人物志

楊繩武字昌倩南昌人萬厯鄉薦授臨安知縣有調繁
之檄適丁外艱服除補四川綿竹綿多盜案繩武以一
獄示精敏萑苻頓息鄰邑有燒香會號召數千人撫軍
檄諸州縣議合勦繩武持之曰此愚民奚煩斧鉞哉緩
之自解耳撫軍納其言卽委繩武撫諭之亂遂定量移
信陽知州左遷衡水升延平同知投効歸

人物志

楊惟相字無技豐城人萬厯鄉舉授延慶州知州延慶古雲中地邊外僅隔一牆時順義未封數擁眾入寇惟相密授機略禽獲奸謀敵驚以爲神適久雨南山邊牆半傾敵乘勢盡拆毀之前此屢修屢壞州守獲罪者十餘人惟相抵任微服步出邊見沙漠草茅相結如窩諸部落寢匿於中因火之敵自是無所棲止不敢窺邊始得一意趣工修牆一萬一千九百八十餘丈節省萬餘金臺使交上其事奏最以邊例晉刑部員外先是滇有逆賊阿克之變至破城劫印顯皇帝震怒逮訊失事撫鎮及白推官京師權貴多求寬解惟相閉門謝客奏請九卿科道會問據法成辟諸權貴竟以私怨中之請養歸田再補官卒著周易蒙訓禮經管見論語膚義行世

府志

夏時化字宣子新建人萬厯鄉舉授永豐縣教諭造士稱得人升太平知縣清節惠政士民戴之崇禎戊辰值流寇作難攻城月餘多方捍禦食盡死守卒殲寇全城事平道府設凱宴時化遽沒於公宴之堂巡撫朱燮元疏請優卹特給以死勤事扁額

人物志

杜彥卿字六人新建人以例入太學試得別駕彥卿不願仕請歸養生平不苟言笑樂善好施而不信因果酷嗜書購求不遺餘力長子果順治丁亥進士改庶吉士授江南道御史贈彥卿如其官

人物志

吳廷謨字孟嘉南昌人萬厯鄉舉少厭帖括博綜羣書欲以古文詞名家與山人羅治相切劘謂明文規倣多

而獨運寡比辭屬事斷自秦漢而止尤工於爲論抑揚
頓挫而要歸至當臨川邱兆麟陳際泰皆亟稱之嘗策
蹇驢發薊門由魯道謁闕里睥岱涉濟泛黃河得詩歌
若干授南城教諭遷安慶望江知縣邑巖而小廷謨政
尙清靜四境以甯亡何以病謝事著鷓鴣園詩草二卷文
草論草舊志誤文各二卷讀古損餘二卷續草佚草各
一卷羅治亦有大月山人集府志

章允儒字珍甫南昌人邦翰子萬歷進士授華亭令方
邊事孔棘詔天下計畝加賦華亭歲額六十萬加至七
十餘萬允儒搜成賦可省者折抵如數再加則設法盡
抵之先後計免三萬七千餘兩允儒於讞決尤稱神明
上官往往以旁郡獄屬之有子殺父妾亡何父暴卒言

以藥弑者允儒曰人命應檢償其父固郡守烏得輕議
檢邪坐殺父妾足以斃逆子矣武弁鴆殺同官弁强有
力且善辯時有使過代請者或曰職官當從減允儒曰
大辟無可贖之法千戶無議貴之條竟擬如律邑之金
家徭有橫尸一老者哭曰吾子也訴之令賊弗得或榜
片紙道旁曰薛某殺人又從薛所得死者所弄二錢允
儒詣其地審視曰得之矣縛庫樓獨居一佻達子至曰
汝殺人立服蓋死者爲變童諉狎不遂因殺之而以弄
錢嫁禍於薛其發奸摘伏多此類用治行異等擢吏科
給事中熹廟初逆璫魏忠賢漸擅威福織造太監李實
尤腴削於東南借違忤上供參知府張宗衡等奪俸允
儒抗疏駁之疏入璫以阻撓龍袍矯旨予杖仍謫戍會

上御經筵首輔葉向高從容陳說意稍解俄以天變修
省從薄譴奪俸一年璫自是深銜之允儒遂請假歸居
吏垣六月凡所爭三案封疆籌邊惜餉疏十餘上皆言
人不敢言鐫級調外旣去仍削奪崇禎改元起吏科都
給事未幾枚卜命下適允儒以首垣主議所推舉皆人
望惟烏程溫體仁不與遂發難言廷推不公竟以削籍
出國門

人物志

邱士毅豐城人萬厯進士選庶吉士洊官南禮部侍郎
天啟乙丑以忤璫歸崇禎己巳璫敗起原官署本部尙
書乞休溫旨慰留辛未視樂文廟忽疾作歸卽逝子祭
葬廕一子所著有吾美樓集

縣志

唐大章豐城人萬厯進士授編修洊官禮部右侍郎有

請建魏璫祠於國學旁者持不可以是奪職歸崇禎初璫敗召還晉禮部尙書兩預枚卜又鄱溫體仁周延儒之爲人每論事面斥其非故陰爲所阻屢疏乞休甲戌改南遂歸里所著文集十卷門人馬世奇梓行

縣志

樊尙璟進賢人萬厯進士天啟中忤璫家居

府志

鍾師薦字維坤南昌人太僕寺卿沂之孫禮部郎允復之子少負異才試棘闈十有三次不得志乃著治平十議詣闕上陳嗣以保舉除泰州同知甲申之後挂冠歸隱二十餘年教授生徒著有四書詒尙書詒易經詒遊吳草蜨園詩草續草樹瓢鳴家訓十則年八十有六卒

白志

饒元瑄字彥昭進賢人邑增廣生性孝友七歲居父喪

哀毀骨立儼然成人事母曲盡愛敬四十年如一日課
子之外不涉塵事家數椽讓弟姪居止獨僑寓孺子宅
旁潛修密證經史性理諸書多有獨契所著五經疏義
經濟彙編良知指歸若干卷藁焚於兵以子宇枻貴累
贈中憲大夫

人物志

萬尙烈字思文新建人諸生時卽以正學爲已任師事
章潢萬厯辛卯舉於鄉授建昌教諭厯擢邵武同知捐
俸刻潢所集圖書編晉比部郎擢平越知府致仕歸杜
門卻埽益肆力於性命之學中丞解學龍督學陸之祺
蔡懋德皆請主澹臺祠太史金聲請主新安還古書院
年九十五卒所著有四書測易贊測詩述傳測聞學雜

記
白志

王時熙南昌人萬厯進士官御史厯太僕寺卿天啟中名在東林子猷定自有傳志

張神武本姓陳新建人萬厯中武舉會試第一授四川都司僉書永甯宣撫以掠禽奢崇明之母奢世續其部呂閻宗傳怒以求主母爲名大掠永甯赤水普市摩泥事聞神武論死遼事興用經略袁應泰薦命從征神武率親丁二百四十餘人疾馳廣甯前至河遇逃卒十餘萬神武激其帥曰以此眾戰誰禦且雖死不失忠義乃鼠竄偷生乎帥不從神武遂獨率所部以進渡河抵首山竟歿於陣所部俱戰死存十四人負重傷還監軍御史方震儒繪神武像率將士羅拜爲文祭之詔贈都督僉事立祠奉祀

國朝賜諡烈愍

白志 勝朝 殉節諸臣錄

李頴字宏明中丞材之子巡按某劾材舉緬冒功逮刑部詔獄論死頴始婚於家聞變草廬囚服詣獄乞代寢處於赭衣蟣蝨之間者六載得減死論戍於漳之鎮海衛頴隨侍戍所十三年萬曆丙午鄉舉天啟改元頴伏闕訴父枉狀凡七上會當部選授閩鄉教諭不赴杜門卻埽所著有中庸參論語測或問臆說四書捷鏡同求錄年代紀要頴舉鄉試第九與其父材伯父棡鄉舉名次皆同又棡以前丙午舉歲陽亦合人以爲異起帥眾奉新人萬曆舉人知瀋安縣事調金華皆有善政擢御史抗疏指陳時事忤逆璫調外鄉元標諸人力爲申奏賜還巡視西甯茶馬秩滿晉太僕卿遷副都御史

以母艱歸老於家

縣志

徐文連奉新人漢高士稱奇萬厯鄉舉厯臨漳崇仁教職撫按交薦推敘州同知當奢酋蹂躪之後奉檄經略永甯請建城於大壩及古蘭州控扼險阻又改土爲流丈田起科於是荒徼土田盡入版圖矣

縣志

陳譚字清庵新建人由貢知孝感縣峻風節政尙慈和巡按令查各屬倉糧絕苞苴剔奸蠹殆盡邑大侵出倉粟貸民全活甚眾尤明決能斷疑獄卒祀名宦

府志

陳良訓進賢人萬厯進士授行人擢戶科給事疏論魏璫鑄級歸戍辰起原官出爲台紹兵備海防有功厯陞陝西布政於流寇充斥中全活饑民甚眾秦人立祠祀之丙子撫鄖陽鄖界秦蜀楚豫之交賊出沒盤踞良訓

簡練將卒以計殲劇盜郭三海等捷聞賜蟒幣銀紵有

差

府志

傳應期字愧石進賢人萬厯鄉舉幼有至性祖母吳病侍湯藥不少懈祖母憐之至爲忍痛詩書之外無他好嘗曰敦五倫乃爲實學舍一貫皆是邪說選授順昌令日與士民講孝弟會楚王造錢具啟力爭以忤藩歸撫按連章薦起原官厯仕太僕卿尋致政嘗銘其座曰大道一貫曰忠曰恕君子持己必敬必恭其學如此

縣志

譔吉臣字仲貞南昌人父應華萬厯時以叅將援朝鮮戰沒吉臣由舉人爲雲夢知縣李自成陷襄陽其黨賀一龍陷德安吉臣急遣孥歸身誓效死弗去城陷被執不食累日賊授以官不屈驅上馬曰我失守封疆當死

更安往乃見殺福王時贈太僕寺丞

國朝賜諡烈愍

明史 勝朝 殉節諸臣錄

楊惟休字叔度豐城人以貢授保定通判管宣府赤城事所著泰昌日錄僅載元年庚申八月事然萬厯末暨天啟初年諸大政悉櫟括其中其記梃擊紅丸移宮三案顛末甚悉大抵是王之案而褒劉一燝周嘉謨楊漣等之忠魏忠賢大怒其黨霍維華疏指一燝等朋比并劾惟休以草莽而記注朝廷起居且稱述舛錯奉旨追燬其書褫革衣巾時惟休已之宣府訛傳屢至竟暴卒既卒忠賢嗾劉志選再劾之未幾三朝典要興所摺擊必日錄所是所嘉與必日錄所非者幸惟休已卒獲免於詔獄慘死惟休著述甚富遭兵燬遂無全帙五經宗

義二十卷僅存易論六篇辨禮一篇歷代長帙七十四
卷僅存戰國之齊楚系南北朝之十八家閩外春秋收
卷天文四卷僅存日行月行日蝕月蝕星緯辰論大衍
歲差靈論暈論數篇衡邊要略一卷僅存博塞一篇宣
雲二篇東事客對一篇他如大治錄二十卷武略十卷
古詩評選十二卷焚餘四卷芒書十卷舒嘯堂雜劇十
卷博古一卷地輿一卷佛宗一卷樂府一卷皆失傳
傳崇中字壹饒南昌人萬歷丙午中應天鄉試在成均
時大司成引問孔鄭箋疏五經同異閒及天人之槩治
安之略酬對如響初授崇安令擢刑部主事奉敕恤刑
粵西尋晉懷慶太守方流寇肆毒軍書旁午徵兵索餉
檄若雨下崇中應之裕如俸入捐饗將士人樂爲效死

藩儲某驕恣不法天子下鎮撫以問郡守崇中先按其
佐從而隸之法以次詰責其悖戾狀不少屈時有密謀
存爵與求襲者皆持萬金爲餽崇中正色拒之寅僚有
誤軍機坐辟屬令有以簠簋逮繫者皆以片言獲免各
致千金爲報力卻之九載報績竟以藩案被謗解組歸
年至九十卒

白志

萬時華字茂先南昌人父民命馬湖太守時華生而穎
異諸經子史無不歷覽成誦家宰李長庚任江西布政
時合十三郡能文者爲豫章社於南昌首時華與萬曰
杜喻全禡時華尤爲所推服工詩詞自萬歷間古近體
率競聲響亡性情公安袁宏道力矯之一變爲長吉蹇
澀無餘味竟陵譚元春又力矯之一變爲劉長卿寒儉

者藉口時華曰詩豈可如是邪乃取陶謝李杜諸家一
開風氣古文權衡於柳子厚而襍以永叔曰子厚能奇
峭不能敘事永叔能敘事也一時以碑版誌銘傳紀序
錄請者無虛日負海內重名幾四十年卒艱於一第崇
禎初保舉守令詔下布政使朱之臣列其品行聞於朝
應徵北上抵維揚以病卒生平篤孝友與人無疾言遽
色廉讓節儉退然若不勝衣於古今得失國家是非時
政利害識始慮終議論之所及節槩之所操持雖賁育
慶忌不能奪也學使侯峒曾稱之曰眞儒舉而祀之學
宮所著溉園初集溉園二集園居田居東湖集又有詩
經偶箋宗尙毛鄭云

人物志

萬一之字不二南昌人讀書務解大意喜酒好客酒後

耳熱抵掌論前人興廢事鑿鑿有據人有善必詡之有過面諍不撓不佞佛不媚權豪事父母至孝天啟乙丑子元吉登第逢熹廟皇嗣慶成許進士榮其所生寓書地封於祖然按會典款例不合意鬱鬱是秋疾革諄諄以父沒未葬母老失養爲憾又遺命勿厚葬當視大父其死不忘親如此

人物志

朱健字子強進賢人天啟鄉舉博聞強記與弟給事徽晨夕淬勵期以著作名當世鍾陵二朱一時比之機雲獻輟著蒼崖子又著古今治平略凡禮樂兵農賦役河漕諸大政錯綜數千載開彙彙如貫珠識者以爲鄭漁仲馬貴與之比授邵武推官靖九都賊以申太守吳文禕棄城奔逃事反爲所中冤死

府志

游允達字兼之豐城人天啟鄉舉授獲鹿令歲大饑稱貸賑濟存活無算各邑輸納恆苦火耗允達令里甲自封投櫃吏胥不得經手邑當山右要衝往來供億浩繁錙銖不擾民間捐貲創建礮臺度賊所必經處綦布之孤城屹若金湯屢登薦剡覩國事可憂力以病請臺使爲具題許病痊起用蓋郡邑異數也去後士民爲立去

思碑

人物志

傅冠字元甫進賢人祖炯南京刑部尙書天啟二年冠舉進士第二授翰林編修崇禎中累官禮部尙書兼東閣大學士誤判章奏引罪放歸唐王時以原官督師巡視江西江西失守冠寓居泰甯爲門人汪亨龍所執死汀州血漬地久而猶鮮汀人歎其忠所著有寶綸樓集

國朝賜諡忠烈

白志勝朝殉節諸臣錄

龔仲泰進賢人天啟鄉舉任崇仁教諭崇禎七年巡按兩薦邊才擢知歸州時全楚已被李賊蹂躪仲泰倉皇赴任勞來招集百務維艱未幾荆襄失守賊渡江掠歸州土豪內訌執仲泰獻賊囚於襄陽不食而死

國朝賜諡節愍

忠錄紀略勝朝殉節諸臣錄

武起潛字用潛進賢人天啟進士官武清知縣治有聲調繁適化坐事被劾解官候代守城死

國朝賜諡節愍

明史李獻明傳勝朝殉節諸臣錄

萬元吉字吉人南昌人天啟進士授潮州推官補歸德捕大盜李守志散其黨崇禎初大計謫官用曾櫻薦以永州檢校署推官事居二年督師楊嗣昌薦其才改大

理右評事軍前監紀嗣昌倚若左右手諸將亦悅服嗣昌卒元吉丁內艱歸起南京職方主事進郎中福王立高傑與黃得功劉澤清方爭揚州元吉奉詔宣諭與得功書令共獎王室得功報書如元吉指乃錄其藁示澤清傑嫌漸解廷議以元吉能輯諸鎮擢太僕少卿監視河北軍務元吉身在外不忘朝廷請修建文實錄并還懿文追尊故號而速褒靖難死事諸臣及近日北都四方殉難者以作忠義之氣從之南京覆走福建唐王命以兵部右侍郎兼右副都御史總督江西湖廣諸軍兼巡撫代楊廷麟守吉安城破入贛州大兵乘勝抵城下贛圍久王加元吉兵部尙書大兵用鄉導夜登城元吉赴水死年四十有四

國朝賜諡忠節

明史勝朝殉節諸臣錄白志舊案同

薦于斯昌袁從諤彭期生周湖王明汲萬發祥林琦王

其宜王其隆黎遂球柳昂霄魯嗣宗錢益亨劉孟鞠劉

應試吳國球郭甯登胡縝林逢春二十三人紳士死者

盧象觀月世光謝講楊萬言孫經世徐餘慶郭其昌聶

邦晨董繼謝明登馬後京陽麗天余孝義金之杰十餘

人謹案于斯昌謝志作朝昌柳昂霄謝志作昂霄劉

孟鞠謝志作孟鞠劉應試謝志作應泗今仍從白志

萬敬宗南昌人貢生光化知縣張獻忠破襄陽敬宗到

官以死自誓賊薄城遂自盡賊義之引去城獲全

國朝賜諡節愍

明史陳美傳勝朝殉節諸臣錄

朱謀舊字公退初字康侯獻王七世孫也少英敏讀書

修辭結廬蛟溪在龍沙之北躬耕賦詩郊居耕釣之作

詞指婉約才名蔚起後寓居金陵

列朝詩傳

朱統鑽南昌人系出瑞昌郡王孫某為鎮國將軍當宸

濠反時將軍不從後濠敗誅而將軍封世不絕五傳至
謀主統鎮父也統鎮始棄爵爲諸生崇禎十年成進士
選知江夏縣在任四年以守禦爲急江夏城廣周三十
餘里鎮爲增修計賊窺城必先窺江沿江數百里可竊
渡者與國則富池黃陂口大冶則西塞山武昌則道士
洑馬橋三江口樊口江夏則白澣鎮入吉堡青山砦縣
東則劉家嘴東北土橋鋪東南卓刀泉縣南李家橋新
館皆與城犄角地大江上游則石嘴又上則金口鎮宜
練土著立水哨船其大江西岸屬漢陽東岡白人磯沌
口宜各就對岸設防令相呼應若漢口以上宗三廟湏
口則宜拒守下水路則黃花淖油湖灑口五潼口陽羅
當立聲援陸設保柵水列竹排上施拒馬機器伏弩禁

賊舟不得順流近岸其城內則分爲十二營城西北外
近江分五營東北城倚山立濠東門外建立大關兵一
營南二大營建石關於漢陽門外曰北關保安門外曰
南關包羅臨江五門招致武士親教技擊習水師閒語
其子議霧曰流賊徘徊穀城志且在武昌吾欲因守禦
練成一旅可以制江之上下則大江以南安枕亡慮矣
未幾卒諸務漸廢後二年流賊果入武昌

邱邦士集

舒孟華字去華靖安人邑貴顯招之合譜孟華與父廬
崢毅然謝去踵蘇明允例獨修支譜以傳前後七試鄉
闈不遇崇禎初貢成均授青田丞孟華曰此固郁離子
著作之地也郁離不高安丞乎日手一編呻吟不置丞
專司鹽兼督糧鹽苦積盜糧苦蠹役暗加孟華設方略

捕獲渠魁且痛革猾胥之漁獵者士民手額以誦秩滿
遷楚衛參軍卒青邑舉祀名宦所著有念梅館集二十

四卷

人物志

朱統鎔字時卿以王孫封奉國中尉僻處城東賓客罕
至傾祿入以購祕冊得輒讀讀輒歷歷不忘每舉子試
二三場畢持試題問所出鎔必備注其語出某所無少
誤人服其博洽著古史記四十卷又推廣余寅同姓名
錄十六卷又有六書微詩解頤錄牡丹志甯獻王事實
皆瞻博可觀

人物志

汪思湛字元淵新建人崇禎鄉舉值天下方亂流寇長
驅所至攻城陷邑士大夫鮮慷慨任事者思湛心竊痛
之會詔廷臣舉堪任守令各一人都諫李汝璨薦思湛

累詔趣詣京師以母年老辭不赴會丙子歲饑奸人挾
宗室無賴子弟望屋而掠諸大家皆拒戶自保思湛亟
謁閫帥沈壽崇曰亂國用重典今亂矣尙得忌器邪壽
崇悟密請於巡撫解學龍禽斬首亂者數人徐發賑勸
施以活飢民境中遂定丁丑下第歸卒於揚州客舍思
湛年二十九喪偶卽不娶平居無邪視無戲言雖燕處
威儀肅然著四書解詩解山房語錄史類及古文詞數
十卷子懋勳康熙庚戌進士

人物志

朱謀敖字用莊明宗室授封鎮國中尉重封奉直大夫
善詩文書畫兼工篆隸著有閒閒閣橐城南草并注六
書正譌周史籀文諸書謀敖賦性孝義制行端謹第三

子統鈺進士

人物志

龔尙升字公起南昌人崇禎閒以經明行修舉任廣西南平知縣清貞律已不名一錢有富民因訟屬庫吏進千金重懲庫吏麾去之爲政崇獎名節務以移風易俗爲先士庶爲建醮祈嗣百里內有屠宰者眾羣毆之其得人心如此卒於任建祠以祀

人物志

李汝璈字用章南昌人崇禎進士知蘄水縣以廉卓稱先是蘄士歷三試失舉汝璈爲建文峯塔立興賢莊置田以供課給賞已而周壽明掄元同榜得雋者七人擢刑科給事中諫疏數十上忤上意又以小犢破犁糾時相遂下刑部獄及赦歸田里聞國變衰經向北哀慟稽首作祈死文遂絕粒卒所著有四書周易講義詒塾小箋幼儀歌掖垣諫草

國朝賜諡節愍

人物志 勝朝
殉節諸臣錄

王介慶字受茲奉新人崇禎中以選貢知泰順才幹明敏課士作人建講堂設射圃修文天祥塔畫定丁口照人輸納稱良吏內擢虞衡司主事

浙江通志

史垂譽字望之豐城人崇禎進士改庶吉士是年以閩賊警臚傳後期迨館選距甲申無幾矣城破垂譽爲賊所得受酷拷濱死者數絕而復蘇逸出城外伏水溝中五晝夜南歸負創跣行終身跛履絕意仕進以壽終

榆墩

外集

陳美字在中新建人崇禎時由鄉舉知宜城縣兵燹之餘民生彫瘵及張獻忠據穀城人情益懼美安輯備至襄陽陷賊兵來犯美偕守備劉相國迎擊賊中伏敗去

巡按御史上其功撫治都御史王永祚以六等課所部
有司美居上上薦於朝未及擢用十五年冬李自成長
驅犯襄陽左良玉先奔永祚及知府以下俱遁賊入城
分兵寇宜城棗陽穀城光化均州美守宜城固拒八晝
夜城陷抗罵不已爲賊磔死

國朝賜諡忠烈

明史物志時

勝朝廟節諸臣錄

白志舊案人

旨褒卹贈光祿少卿宜
城民立忠烈祠祀之

熊洪字開先新建人年十九督學拔冠通郡文名蔚起
家貧屢困場屋崇禎庚午仲子文舉舉於鄉洪時年五
十餘遂棄去諸生專工吟咏明年文舉成進士由合肥
令陟銓曹每持議論頗不愜於柄人適同鄉某通書政
地雜以隱語波及洪柄人遂借以相中洪閒關對簿事

得白歸里著足庵詩藁

人物志

魏時光南昌人

勝朝殉節諸臣錄作新建人

善舞雙刀崇禎九年夏

爲廣濟典史邑遭殘破長吏

謝志誤史

設排兵三百人委之

教練其冬賊據蘄州河口憚時光不敢渡時光募死士
夜襲其營手殺數賊俄賊大至部卒皆散時光單騎據
高坡又殺數人賊環繞之勒斷被執不屈死其兄陳於
上官卻不奏兄憤發病死友人收殮之哭盡哀曰弟爲
國死兄爲弟死吾獨不能表暴之乎具牘力陳乃奏聞
贈廣濟主簿卹典

國朝賜諡烈愍

明史王盡傳勝朝殉節諸臣錄

勝

唐良懿字我來新建人崇禎進士知宜賓縣時滇蜀爭
界當事者閱筆數年良懿案行其地爭立解考選工曹

升營繕郎纂修本部實錄升徽甯道副使解組歸絕迹
城市布衣脫粟蕭然自得卒年八十有三

人物志

饒元珙字仲璨進賢人崇禎舉人授工部主事歷官郎
中繕營房飭守備勤慎罔懈司廠臨清刻陋規略盡解
組歸戊子七月避兵鶴仙峯元珙被執子字相從匿所
急出請以身代父子并死

國朝賜諡節愍

白志 勝朝
殉節諸臣錄

羅儀則字鶴在南昌人性樸重崇禎時以歲貢廷對特
賜進士知三水縣辛巳水災田廬盡沒請於制府力行
賑卹親督築隄郊居連月是秋遂大有又開文明門築
青雲路建文昌閣自是邑士文學日興後竟以樸率去

官邑民立祠祀之

廣東通志

王錫字子美新建人崇禎進士授四川巴縣令甲申正月搖黃賊巨萬薄巴城錫整銳力戰賊大潰追斬劇賊黑虎馬超等搖黃以平夏五月獻賊深入重慶破墊江錫毅然率兵往復之賊恨甚遂集巨萬以六月十六日攻重慶錫逆戰鉅鏹峽用火礮擊沈賊艦數百艘賊蒙巨版穴城錫令澆以井油多爛死尋城角樓火發賊伏入遂蜂擁而前同時被執者七人瑞藩以避亂至與馬錫顧而謂曰時至此死耳膝不可屈賊問爾卽巴縣王知縣乎是曾殺我官損我將士堅壁不降者今何說錫挺然曰弗克殲爾以報朝廷我之恨也尙何說厲聲罵不已賊怒令拔其舌仍含糊搖首作詈罵狀賊益怒鎗其股按令屈膝不屈砍之且刳左臂明日昇至武場縛

樹上射之又斃而烙之不令還絕又火其骨不令裹尸還葬其部民有逸出者述所見如此聞者哀之

國朝賜諡忠烈

何一廌撰傳勝朝殉節諸臣錄

周定仍南昌人崇禎進士與萬文英胡奇偉舉兵保廣信唐王卽以爲右僉都御史巡撫其地城破死之

國朝賜諡節愍

明史詹兆恆傳勝朝殉節諸臣錄

朱統鈔字章華瑞昌王之孫崇禎進士選庶吉士授簡討充展書官召對記注編纂六曹章奏升右諭德經筵日講纂修玉牒大明會典五經注書乙亥冊封襄藩庚辰分禮闈壬午典試江南升南國子監祭酒以父老疏辭奉旨南雍亟資造士不得以私情陳請遵旨赴任而歿生平清介自守居家以孝友稱每休沐惟閉戶讀書

恂恂如書生貫穿經史習國典熟朝報能成誦在宮詹

日極承宸眷凡奏疏幾盈尺兩試所拔多名倘著有我

法居集

人物志 白志舊案明宗室在江西者多好學茲所采外尚有石城王孫謀塚字藩甫工詩有

集今不傳

劉大猷字克敬南昌諸生少孤事母至孝刲股愈母疾

力學工古文詞明季避兵新吳卒所著詩文燬於兵燹

人多惜之以子良玉貴贈兵部主事

白志 原案列朝詩傳有熊夢祥字

自得號松雲道人余註字士平萬白字孟素俱豫章人皆有詩名無事實可采附此

劉斯陞字士雲一曠子弱冠爲諸生有文名時海內頗

沾蔚興斯陞與里中萬美叔陳士業徐巨源甘禹符鄧

左之余小星李平叔並主文社四方名俊莫不望走其

門體素羸病消渴卒年三十六子賡順治辛卯舉人

白志

羅大任字小遜豐城人崇禎進士改庶吉士授簡討升
國子司業晉右中允管理誥敕典順天試得士爲多癸
未冊封益藩便歸里門生平坦易無城府和而有介節
優游林壑屢聘不起年八十餘卒

白志

衷崇寅南昌人崇禎舉人司李梧州公明敬慎案無留
牘遇事必洗心滌慮究悉周詳大獄多所平反舊例府
僚咸理廠務一季寅辭以爲明刑不關錢穀其清介持
風紀如此

廣西通志

葉二蘭字馨季新建人幼失怙年十六卽館江南月附
米商舟歸以奉母主人憐其貧贈百金辭不受後以歲
薦厯新城萬年教諭時歲歉督課急諸生請寬於郡邑
不得乃罄橐中得百四十金代輸之秋滿授邑令以母

老辭職歸養

縣志

劉浚字恆南南昌人崇禎拔貢生博極羣書以母老絕意仕進教授生徒一時節義文章之士皆出其門母卒奉父柩合葬廬墓三載時年已七十餘所著有太易瑣言嚴軒集年八十卒學者私謚孝德先生崇祀鄉賢

縣志

熊培元字大初豐城人崇禎鄉薦庚辰特用授朝城令時歲大饑盜賊竄起培元盡法賑卹撫字多方修築城池峙備戎具盜賊無所得逞以勞瘁卒官

縣志

周必顯字宗人甯州人賊攻城父母年老不能行必顯曰仲弟無嗣季弟有子而稚宜急去我有二子當護二親賊至索金燔其背其母泣救受刃必顯執刃泣曰苟全我親我命奚恤賊竟殺之同城諸生陳嘉容遇賊賊

持刃向其母嘉容給以金母得脫賊怒殺之又州人溫

奇梧以尋母爲賊所殺

白志

朱統鑑字司烜南昌舉人崇禎十二年以臨安府別駕署石屏州卹民疾苦異龍湖有水壩魚梁壅塞水道鑑乃捐俸給值改築堅隄湖水東流淤田復墾舉州世食

其利建祠祀之

雲南通志

胡懷南昌

一作竟陵

人官戶部員外郎崇禎十五年闖賊陷

竟陵不屈死

國朝賜諡節愍

勝朝殉節諸臣錄

龔新南昌人崇禎鄉舉知河南內鄉縣流賊陷城自縊

死

國朝賜諡節愍

勝朝殉節諸臣錄

熊緯字文江南昌人崇禎進士授行人兩京既覆涕泗交橫乃赴延平謁唐王擢給事中扈行至汀州唐王被執從官皆散緯仍奔赴死之

國朝賜諡烈愍

明史鄭為虹傳勝朝殉節諸臣錄

龔棻南昌人崇禎進士入閩唐王授吏部驗封主事一作郎率羅亞福軍赴贛州城將破萬元吉勸其出爲後圖棻赴水死

國朝賜諡節愍

縣志勝朝殉節諸臣錄

朱議漈南昌人廣西道御史事桂王奉命圖去孫可望事洩被殺

國朝賜諡烈愍

勝朝殉節諸臣錄

徐必達南昌人副總兵守吉安戰敗赴水死

國朝賜諡節愍

勝朝殉節諸臣錄

萬文英字仲實

文英字據縣志

南昌人崇禎進士爲鳳陽推官

賊至文英臥病賊索之子元亨年十六泣語父曰兒不得事親矣出門呼曰若索官何爲我卽官也賊繫之元亨大罵不屈賊怒斷脛死文英脫歸唐王授兵部員外郎監黃道周諸軍協守廣信兵敗鉛山舉家赴水死

國朝賜諡節愍

明史詹光恆尹夢龍傳勝朝殉節諸臣錄

胡奇偉進賢人官兵部主事唐王授湖東道副使守廣信兵敗死之

國朝賜諡節愍

明史詹兆恆傳勝朝殉節諸臣錄

朱由棖新建人由宗貢官寶豐知縣崇禎十四年闖賊陷城罵賊死

國朝賜諡烈愍勝朝殉節諸臣錄

胡士瑞一作瑞進賢人福建道御史奉持王命謀去孫可

望事洩被殺

國朝賜諡烈愍勝朝殉節諸臣錄

黃龍一作龍南昌一作東人屢著戰功官至鎮守東江總兵

官都督僉事崇禎六年大兵破旅順力戰不勝自刎

死

國朝賜諡忠烈勝朝殉節諸臣錄謹案南昌縣志有黃

董承其蔭遂冒母姓積官後軍都督大兵南下無子

者惟董與黃得功得功死董徘徊池州太平間無所向

鄭芝龍招之遂移兵江口與吳志葵結營

李國祿豐城人錦衣衛千戶京師陷自縊死

國朝賜諡節愍勝朝殉節諸臣錄

朱統錡新建人黃州同知軍前監紀崇禎十六年拒獻

賊陣亡

國朝賜諡節愍

勝朝殉節諸臣錄

徐極江西人吏科給事中奉桂王命謀去孫可望事洩

被殺

國朝賜諡烈愍

勝朝殉節諸臣錄

胡士奇江西人

武甯縣志作武甯北鄉人

郊縣典史崇禎十五年城

陷死之祀忠義祠

勝朝殉節諸臣錄

謹案徐極胡士奇勝朝殉節諸臣錄但稱江西人今

附此

陳烈南贛將官丙戌十月贛城破被執憤罵不屈兵怒

寸磔死

南昌縣志

謹案勝朝殉節諸臣錄稱陳烈籍貫未詳南昌縣志據恥躬堂集定為南昌人江

人事又作字啟南樂安人

李明忠字蓋臣新建人任山東昌邑主簿憤時事不振棄官遊京師毛文龍聞其名延入幕與孔有德耿仲明友善文龍死馳歸京師上書言方略不報福王監國南都督輔史可法選奇才勇略之士明忠居第一授廣東西山副將擢潯梧總兵桂王監國以太子太傅都督高雷廉瓊掛甯武將軍印封海康伯晉爵信宜侯 大兵下廣州耿繼茂念明忠與其父舊交遺書招之明忠斬其使及屢戰不利退保博白山中已而走欽州龍門嶼先是廣州破總督杜永和及博興侯張月走瓊州至是明忠欲往依之永和誘執以獻繼茂繼茂勸其降明忠仰天笑曰嗟乎繼茂吾初別皮島時從汝父言分藩開府久矣吾明室遺臣力盡死之復奚言囚七日而死

劉天駟字季駟新建人舉崇禎庚辰武會試第一總督
呂大器袁繼咸先後疏薦天駟才可大用會袁州天井
窩土寇四掠天駟監郭雲鳳等軍勦平之甲申間變與
清江楊廷麟等倡義勤王 大兵旣下金陵依贛州總
督李永茂唐王授以總統前軍都督府事守龍泉黃土
關轉戰螺水敘功晉右軍都督府同知吉安不守與廷
麟退保贛州先是天駟族人劉靖劉天柱劉良瑚劉良
讜圖攻瑞州不克至是趨會於贛且戰且守援絕餉匱
贛州破天駟聞廷麟死清水塘赴水同殉其下固持之
遂被執械至南昌諭降不聽遂就刑桂王子諡忠烈府
許文龍字雲樓甯州人諸生博覽羣籍通曉兵法及歷
象星宿奇門遁甲之術闖賊犯州境文龍練義勇保禦

鄉里何騰蛟開府武昌招之未赴委授監軍 大兵下江右金聲桓復遣人招文龍不從屯兵奉鄉聲桓破州城遂攻奉鄉圍之三月糧絕走界首砦卒以食盡被禽不屈死

府志

黎元寬字博庵南昌人崇禎進士授工部主事權浙南關歷兵部郎中浙江提學副使明亡絕意仕進構草草廬於谷鹿洲日與及門講貫周秦以來古文之學順治初有薦之者以母老固辭年八十以壽終著有進賢堂

彙

白志

劉繼遠字仁宇奉新人崇禎閒官豐縣主簿時流賊充斥令以憂歸繼遠言於直指使者請移老弱河南招募丁壯爲固守計直指壯其謀檄攝令事五月僞帥武恻

兵至豐遣人諭降繼遠斬之憐怒攻益急繼遠以血書
求救於軍門七月禽憐及僞官范道顯等事聞授豐縣
知縣 大兵破徐州繼遠被執不屈

世祖嘉其忠特命原之仍以知縣用繼遠不就閒道走淮南投
閹部史可法往來兵閒卒無所就後於揚州聞可法殉
難哭曰無能爲矣乃決志南歸結廬深山中方袍幅巾
終身稱逋臣

府志

陳宏緒字士業新建人道亨子性警敏好學家集書萬
卷兄弟朋友日夜講習以任子薦授晉州守時眞定屬
邑多殘破閣臣劉宇亮出督師欲移師入晉州宏緒拒
不聽被參緹騎逮問士民哭闕下頌其保城功得釋謫
湖州經歷署長興孝豐二縣事有惠政尋爲巡按劾罷

後屢薦不起

白志 謹案

陳宏緒見明史附其父道亨

昌縣志尚有李謚官黃州通判偕子改附明末又案南

庚之難張沔有官岳州府教授舉家死回之府推官後受史可法

官湖廣長陽令舉家死文官回之府推官後受史可法

方主事死於浦城段振文死魏四冲以父蔭官主事摧都

署監軍揚州城破不屈死應魏四冲以父蔭官主事摧都

勻知府聞甲申變治戊子父時應魏四冲以父蔭官主事摧都

甯訓導歸里順治戊子父時應魏四冲以父蔭官主事摧都

甲申聞變不食死弟大本監生亦死鄧林祖武舉官都

督同知順治二年南都不守監生亦死鄧林祖武舉官都

奇九江總兵官順治乙酉被禽聞安光被執自刎死鄧林

總兵為黃蜚協將蜚死入閩唐王授後軍都督加太子

太保借揭重熙經理江閩遇檄論左良玉被執不屈胡華

甯官淮安參將李邦華遣持檄論左良玉被執不屈胡華

死遂入良王軍與金聲桓舊識戊子舉事後憂憤死陳善

孤繼郁生員居鴻雁橋戊子十二月閩門自縊死陳善

受桂王駕部丁亥招集士卒為省中聲援戰敗死生戊子

與豐城舉人鄧見招集士卒為省中聲援戰敗死生戊子

祠宗貢死廣東朱議泐潯州通判死豐城朱奇貢乙

酉自縊吳鎮丁家山萬寶死建昌胡學海官總兵丙戌

死南康李憲官上饒教諭死金王之難萬鵬官上高教

諭甲申聞變棄官歸招集團練土寇遊兵不敢犯其境

時官交阻縣令遇害熊靖正統中與土木之難諸生鍾
 嶺按察司書吏丁時魁俱為宸濠所殺諸生楊太冲字
 不盈聞乙酉變自經死又有姜曰遷姜之連姜之英黎
 士彥喻其廣萬曰昭黎士奇萬時略萬時神彭星伯萬
 翔萬懋鉉萬莊甫徐作霖朱奇並列明李忠義又案
 奉新縣志崇禎十五年逆賊李肅十為亂有北鄉材官
 闕其名帥師與賊戰死之又從善鄉人余道統謀殺賊
 事覺為賊支解又案明史孝義傳序仿新唐書例擬
 敘里居姓名其以孝行旌門者永樂開永新唐書例擬
 德開浮梁洪信文正統開樂安孫整成永新唐書例擬
 訓導張憲永豐呂威宏治開樂安謝紳南昌左衛黃連
 安福劉珍豐城余壽正德開宜春易直嘉靖開江西南
 冠雄曾柏萬歷開江西余壽正德開宜春易直嘉靖開
 新建樊微舒泰會昌歐于復鄱陽李岐奉新周勃南昌
 曹必和天啟開吉水郭元達宜春鍾明揚峽江黃國賓
 臨川傅合萬載彭夢瑞南昌楊可幸萬安羅應資樂安
 曹希和崇禎開江西王之範以義行旌門者成化間豐
 城劉志清六世同居天啟開吉安城王煥入世同居以
 財助官振濟旌門者正統開吉安城王煥入世同居以
 范孔孫餘干舒彥祥隆慶開江西胡有初謝子寬浮梁
 黎金球天啟開南城吳煥其中縣名錯出又有統稱
 江西者舊志或有傳或無傳不便分析並附於此

江西通志卷一百三十八